

आकाशवाणी

खास-खास खबरां:-

- मतदाता सूचियें दी विशेष नजरसानी SIR दा दूआ गेड़ 12 राज्यें ते केन्द्र शासत प्रदेशें च आयोजित कीता जाहग। खीरी मतदाता सूचि अगले बरे 7 फरवरी गी प्रकाशत कीती जाग।
- राष्ट्रपति द्रौपदी मुरमू होर अज्ज 8में अंतराष्ट्रीय सौर गठबंधन सम्मेलन च मुख भाषण देगन।
- विदेशमंत्री डाक्टर एस. जयशंकर होरें कल आस्ट्रेलिया दे प्रधानमंत्री एंथनी-एलबनीज ते न्यूजीलैंड दे प्रधानमंत्री क्रिस्टोफर लक्सन हुंदे नै मलाटी कीती ते दौनें मुखे कन्ने दबकखी सरबन्धें दे बारे च चर्चा कीती गेई।
- चक्रवाती तूफान “मोन्था” बंगाल दी खाड़ी च तेजिया कन्ने उत्तर पच्छिम दिशा च अगड़े बधै करदा ऐ। मौसम विभाग नै आंध्र-प्रदेश ते ओडिशा दे समुन्द्री कंडे ते छत्तीसगढ़ दे कैई इलाकें लेई रेड-अलर्ट जारी कीता ऐ।
- चढ़दे सूर्ज गी अर्ग देने ते विशेष-पूजा अर्चना दे कन्ने गै चंऊ दिनें धोड़ी चले दा छठ दा पर्व अज्ज सम्पन्न होई गया।
- ते कुश्ती च भारत दे सुजीत कल्कल नै 23 बरे कोला हेठली उम्मी दी विश्व चैम्पियनशील च सुन्ने दा तगमा हासल कीता।

<><><><><><>

ECI SIR

मतदाता सूचियें दी विशेष नजरसानी SIR दा दूआ गेड़ 12 राज्यें ते केन्द्र शासत प्रदेशें च आयोजित कीता जाग। अखीरी मतदाता सूची अगले बरे 7 फरवरी गी प्रकाशत कीती जाग। मुख चुना आयुक्त ज्ञानेश कुमार होरें कल नमी दिल्ली च एक प्रैसवार्ता च गलाया जे एह प्रक्रिया उत्तर-प्रदेश, गुजरात, मध्य-प्रदेश, छत्तीसगढ़, राजस्थान, तमिनाडू, पच्छिम-बंगाल, गोआ, पुडुचेरी, अंडमान ते निकोबार ते लक्ष्यद्वीप गी कवर करोग। उनें गलाया जे SIR दे दुए गेड़ च 51 करोड़ मतदाता शामिल होगन। चुनां कमीशनर होरें गलाया जे छपाई ते सिखलाई सरबन्धी कम्म अज्ज थमां शुरु होग ते 3 नवम्बर गी समाप्त होग। मतदाता सूचियें दा मसौदा 9 दिसम्बर गी प्रकाशत होग। 8 जनवरी 2026 तगर दावे ते ऐतराज दर्ज होगन ते अगले बरे 9 दिसम्बर शा 31 जनवरी तगर समापन ते सुनवाई कीती जाग।

<><><><><><>

राष्ट्रपति द्रौपदी मुरमू होर अज्ज नमीं दिल्ली दे भारत मंडपम च 8में अंतराष्ट्रीय सौर गठबंधन (ISA) सम्मेलन च मुख भाषण देगन। नमीं ते परती-पतियै बरते जाने आहली ऊर्जा मंत्री प्रहलाद जोशी होर अज्ज ISA दे उदघाटनी सत्र गी सम्बोधित करगन। चऊ-रोजा इस वैश्विक आयोजन च दुनिया-भर दे 124 मुख ते 40 शा ते मते मंत्री हिस्सा लै रदे न। एह सम्मेलन वैश्विक समुदाय दे सहयोग गी मजबूत करने ते इक उज्जवल टिकाऊ भविकाख लेई सौर ऊर्जा गी अपनाने च तेजी लेआने लेई आयोजत कीता गया ऐ। इस दौरान सदस्य मुख इस दिशा च होई दी प्रगति दी समीक्षा करगन चुनौतियें दे हल उपपर चर्चा करगन ते सब्भनै तगर किफायती ऊर्जा पजाने दे लक्ष्य दी बता पर कम्म दी अमलावरी उपपर विचार-विमर्श करगन।

<><><><><><>

Dr. S. Jaishankar

विदेश मंत्री डाक्टर एस. जयशंकर होर कल आस्ट्रेलिया दे प्रधानमंत्री एंथनी-एलबनीज़ ते न्यूजीलैंड दे प्रधानमंत्री क्रिस्टोफर लक्सन हुंदे कन्नै मलाटी कीती। इनै बैठकें च दपक्खी सरबंधें दे बक्ख-बक्ख पैहलुएं उपपर चर्चा कीती गई। इक सोशल मीडिया पोस्ट च विदेश मंत्रालय नै भारत ते न्यूजीलैंड बश्कार आपसी सहयोग अगगे बधाने ते हिंद प्रशांत क्षेत्र गी मुक्त बनाने दी क्रिस्टोफर लक्सन हुंदी प्रतिबद्धता दा स्वागत कीता। डाक्टर एस. जयशंकर होर जापान दे विदेशमंत्री मंत्री मोतेगी-तोषी मित्सु हुंदे कन्नै बी मलाटी कीती। उनै मलेशिया, ब्राजील ते बुनेई दे विदेश मंत्रीयें कन्नै बी क्षेत्रीय मुद्दें उपपर चर्चा कीती। एह बैठकां 20में पूर्व एशिया शिखर सम्मेलन 2025 दे बक्ख-बारे आयोजत कीतियां गइयां।

<><><><><><>

PM Maritime Leaders

प्रधानमंत्री नरेन्द्र मोदी होर कल बुधवारें मुम्बई च मैरीटाइम लीडर्स कॉन्क्लेव गी सम्बोधित करगन। इस मौके पर मोदी होर “भारत समुन्द्री सप्ताह 2025” च ग्लोबल मैरीटाइम सी.ई.ओ. फोरम दी बी अध्यक्षता करगन। प्रधानमंत्री हुंदे “समुद्री अमृत काल विजन 2047” च महत्वाकांक्षी समुन्द्री बदलाव लेई उंदी निष्ठा ते वचनबद्धता गी साफ दिखेया जाई सकदा ऐ। एह आयोजन सतत समुंद्री विकास, लचीली बंड श्रृंखला, ग्रीन नैवीगेशन ते समावेशी नीली अर्थबवस्था लेई विचार बटांदरे लेई कीता जा रदा ऐ। भारत समुन्द्री सप्ताह 2025 च 85 कोला मते देशें दे प्रतिनिधि ते साइडे 3 सौ कोला मते अंतराष्ट्रीय वक्ता हिस्सा लै करदे न।

<><><><><><>

PM Youth

प्रधानमंत्री नरेन्द्र मोदी होरें देश दे नौजवानें गी विकसित भारत Quiz प्रतियोगिता च हिस्सा लैने दा आग्रह कीता ऐ। इक सोशल मीडिया पोस्ट च प्रधानमंत्री होरें गलाया जे दुआ विकसित भारत युवा नेतृत्व संवाद देश दे नौजवानें लेई देश दे निर्माण च योगदान देने दा शानदार मौका ऐ। इच्छुक मेदवार इस महीने दी 31 तरीक तगर इस प्रतियोगिता च हिस्सा लेई सकदे न ते एह प्रतियोगिता अगले बरे 10 शा 12 जनवरी तगर आयोजित कीती जाग।

<><><><><><>

Cyclone Montha

चक्रवाती तूफान मोन्था बंगाल दी खाड़ी च 15 किलोमीटर पही घंटे दी रफतार कन्नै उतर-पच्छिम आहली बकखी अगड़े बधै करदा ऐ ते चेन्नेई कोला 420 किलोमीटर पूर्व दिशा च केन्द्रत ऐ। मौसम विभाग नै आंध्र-प्रदेश ते ओडिशा दे समुन्द्री कंडे ते छत्तीसगढ़ दे केई इलाकें लेई कल्लै तगर रेड अलर्ट जारी कीता ऐ। मछेरें गी सलाह दिती गई ऐ जे ओ इस महीने दी 29 तरीक धोड़ी इनें इलाकें च नैई जान। प्रधानमंत्री नरेन्द्र मोदी होरें आंध्र-प्रदेश दे मुख्यमंत्री एन. चंद्रबाबू नायडू हुंदे नै गल्लबात कीती ते केन्द्री सहायता दा भरोसा दोआया। नायडू होरें अपने अधिकारियें गी हेठले इलाकें थमां लोकें गी राहत केन्द्र च मुंतकिल करने दा हुक्म जारी कीता ऐ। प्रभावत जिलें च स्कूल बंद रखने दा बी हुक्म जारी कीता ऐ।

<><><><><><>

IMD Weather

भारती मौसम विभाग नै रायलसीमा, तमिलनाडू, पुडुचेरी, कराईकल ते तेलंगाना च अज्ज भारी थमां बड़ी बारी बरखा दी पेशगोई कीती ऐ। विभाग नै ओडीशा, छत्तीसगढ़ ते तटीय आंध्र-प्रदेश च भारी बरखा दा रेड अलर्ट जारी कीता ऐ। तटीय कर्नाटक, पूर्वी राजस्थान, पच्छिम बंगाल, गुजरात, झारखंड, केरल, माहे, कोनकल, गोआ, मध्य-महाराष्ट्र, कर्नाटक ते विदर्भ च बी अज्ज हलकी थमां भारी बरखा पौने दी मेद ऐ। विभाग नै अंडमान ते निकोबार लक्षद्वीप, पच्छिमी मध्य-प्रदेश ते राजस्थान च इस महीने दी 30 तरीक तगर अंधी-झकखड़ चलने ते बिजली चमकने दी पेशनकोई कीती ऐ।

<><><><><><>

Hurricane Melissa

जमैका इस बरे दे सब्भने शा ताकतवर तूफान “मेलिसा” दा सामना करने आहला ऐ। समुन्द्रै च 175 मील फही घंटे दी रफ्तार कन्नै एह तूफान चलै करदा ऐ ते अज्ज शामी तगर एहदे जमैका दी जिमी तगर पुज्जी जाने दे आसार ऐ जेहदे नै पूरे कैरिबियाई टॉपू च मती तबाही दी शँका जताई जा रदी ऐ। अमरीका दे राष्ट्रीय तूफान केन्द्र मुजब “मेलिसा” अज्ज शामी तगर जबरदस्त खतरनाक बहाए ते जानलेवा समुन्द्री लैहरें दी शकल च जमैका पुज्जी जाहग, जेहदे चलदे अगले 4 दिने तगर जमैका दे मते सारे इलाकें च तेज बरखा बरौग। “मेलिसा” तूफान नै हैती ते डोमिनिकल गणराज्य च पैहले गै 4 लोकें दी जान लेई लैती दी ऐ। जमैका सरकार नै किंगस्टन ते होरनें किश इलाकें गी खाल्ली करियै सुरक्षत थाहरें उठी जाने दा हुक्म जारी कीता ऐ।

<><><><><><>

Chhath

अज्ज बड़लै चढ़दे सूरज गी अर्ग देइयै विशेष पूजा-अर्चना दे कन्नै गै 4 दिने दी छट्ठ पूजा सम्पन्न होई गेई। वर्त रखने आहली महिलायें ऊषा अर्ग दे कन्नै गै पवित्र नदियें-सरोवरें च शनान करियै वर्त पोआरेया। इस मौके बन्ज दी बनी दियें टोकरियें च ठेकुआ, फल, फुल्ल, नारियल, धूफ, जोत ते होर दूई पूजा सामग्री लेइयै महिला करीब 36एं घंटे दा अपना वर्त पोआरदियां न। उआं ते एह पर्व उतर भारत दे कैंई राज्यें च मनाया जंदा ऐ पर बिहार दा मूल रूप च पर्व होने दे कारण उत्थे इसी लेइयै मता जोश शरदा ते भक्तिभाव ते शानदार आयोजन दिखने गी लब्दे न। उत्थै अज्ज पारम्परिक छठ लोक गीतें दी गूंज च शरदालू गंगा, गंडक, कोसी, बागमती ते कमला बलान सनें राज्य दियें कैंई होर नदियें दे कंडे शनान करियै छट्ठ पूजा दा समापन कीता। दरेयाएं दे कंडे शनान दा सिलसिला अर्जे बी जारी ऐ।

<><><><><><>

Wrestling

कुश्ती च भारत दे सूजीत कल्कल नै 23 बरे कोला हेठली उम्मी दी विश्व चैम्पियनशी च सुन्ने दा तगमा जिती लैता ऐ। कलकल नै मर्दे दी फ्री स्टाईल 65 किलोग्राम श्रेणी च उज्बेकिस्तान दे उमिदजोन जलोलोव गी 10-0 कन्नै रहाइयै खताब अपने नां कीता। एह मकाबला छड़ा 4 मिंटे 54 सकिंट धोड़ी चलेया सुजीत कल्कल दा एह पैहला विश्व खताब ऐ एहदे शा पैहले इस नौजवान भारतीय पलोआन नै दंऊ अंडर -23 एशियाई खताब ते इक अंडर -20 एशियाई चैम्पियनशिप च सुन्ने दा तगमा जिते दा ऐ।

<><><><><><>